

दिनांक : 29.03.2026

समय : 18.45 बजे

आकाशवाणी जयपुर—अजमेर

प्रादेशिक समाचार

- प्रधानमंत्री नरेन्द्र मोदी पश्चिम एशिया रा हालात ऊँ उत्पन्न चुनौतियां ऊँ कामयाबीपूरण बारे निकळण रो भरोसो जतायो ।
- आकाशवाणी ऊँ 'मन की बात' कार्यक्रम मांय प्रधानमंत्री सौर ऊर्जा ने बत्ती ऊँ बत्ती काम मांय लेवण माथे जोर दियो—जयपुर रा काश्तकार मुरलीधर रा जीवन मांय सोलर पम्प ऊँ आया बदलावा रो जिको कर्यो ।
- मुख्यमंत्री भजन लाल शर्मा आर.ए.एस. परीक्षा—2023 मांय चुणी ज्या नुवा नियुक्त लोकसेवकां ऊँ बतळ करी ।
- प्रदेश मांय न्यारी—न्यारी ठौड़ां पश्चिमी विक्षोभ रा असर ऊँ एक अप्रैल ताई आंधी—बिरखा रो दौर चालण री आस ।

000

प्रधानमंत्री नरेन्द्र मोदी ने कह्यो है के पश्चिम एशिया रा हालात मांय भारत री ऊर्जा जरूरतां सारू चुनौती पैदा कर दी है । आकाशवाणी ऊँ मन की बात कार्यक्रम मांय श्री मोदी कह्यो के ओ मुश्किल बगत है । वणा देशवासियां ऊँ एकजुट व्हे र अफवाहां ऊँ बचण री सलाह दी । श्री मोदी कह्यो के भारत परिस्थितियां रो डट ने मुकाबलो कर रियो है ।

.....
प्रधानमंत्री भारत री महान संस्कृति अर विरासत ने दिखावण सारू लोगां ऊँ भागीदारी री भावना दिखावण वाळा ज्ञान भारतम सर्वे माथे जोर दियो । वणा राजस्थान रा अभय जैन समेत दूजा राज्यां रो जिको कर्यो जिण जिण पांडुलिपियां री मार्फत देश री धरोहर ने बचावण मांय भूमिका निभायी है ।

.....
प्रधानमंत्री कह्यो के माई भारत, राष्ट्र—निर्माण री जिम्मेदारी ने पूरो करण मांय मोटी भूमिका निभा रिया है । श्री मोदी कह्यो के देश रा केई हलकां मांय गर्मी सरू होवण रे साथै ई, पाणी बचावण सारू फेरू प्रतिबद्ध होवण रो बगत आयी ज्यो है ।

.....
प्रधानमंत्री सोलर पैनल अर पी.एम सूर्यघर बिजली योजना री बात करता जयपुर मांय मुरलीधर रो जिको कर्यो अर सोलर अपणा र खेती करण माथे वां री सरावना करी ।

.....
प्रदेश मांय ई मन की बात कार्यक्रम ने ले र उमाव निजर आयो । मुख्यमंत्री भजनलाल शर्मा जयपुर जिला रा जमवारामगढ़ रा पी.एम.श्री विद्यालय मांय लोगां रे साथै मन की बात कार्यक्रम सुण्यो । इण रे पछे वणा कह्यो के राज्य सरकार काश्तकारां अर नौजवानां रा हित मांय केई फैसला लिया है । श्री शर्मा कह्यो के नौजवानां ने खुद रा रोजगार सारू जाग जगावण सरकार एक करोड़ रिप्यां ताई रा कर्ज माथे बैंक गारंटी देय री है ।

.....
ई दौरान विधायक अर जन नुमाइन्दा मौजूद रिया । वटे ई पाली जिला मांय ई केई ठौड़ कन की बात कार्यक्रम सुणी ज्यो ।

0000

केन्द्र सरकार कह्यो है के देश भर रा सगळा पेट्रोल पम्पा माथे पेट्रोल अर डीजल रा चाहिजता बन्दोवस्त है। सरकार लोगां ऊँ अफवाह माथे भरोसो नी करण री अरज दोहरायी है। पेट्रोलियम अर प्राकृतिक गैस मंत्रालय कह्यो कह्यो उपभोक्तावां ने मदद देवण सारू पेट्रोल अर डीजल माथे उत्पाद शुल्क दस रिप्यां लीटर घटा दीरीजी है। घरेलू मौजूदगी तैय करण सारू विमानन टरबाइन ईंधन माथे निर्यात शुल्क ई लगायी ज्या है। मंत्रालय कह्यो के घरू एलपीजी री सप्लाई बरोबर है। रोज 55 लाख ऊँ बत्ती सिलेंडर सप्लाई कर्या जावे। घरां अर परिवहन सारू प्राकृतिक गैस ने प्राथमिकता दी जावे, जद के पीएनजी कनेक्शनां रो तेजी ऊँ पसारो कर्यो जा रह्यो है। मार्च मीना मांय घरू अर कारोबारी समेत दो लाख 90 हजार ऊँ बत्ती नुवा कनेक्शनां ने पी.एन.जी. ऊँ जोड़ी ज्या है। इस बीच प्रदेश मांय एलपीजी, पेट्रोल-डीजल री वाजिब सप्लाई सारू राज्य सरकार चोखा इन्तजाम कर री है। साथै ई प्रशासन कानी ऊँ लोगां ऊँ बचण री अरज करी जावे। भीलवाड़ा जिला कलेक्टर जसमीत सिंह संधू कह्यो कि ज़िला मांय एलपीजी, पेट्रोल-डीजल री पूरी तरह मुहैया है। कठे ई कोई कमी नी है। हालात ने बरोबर बणाया राखण सारू जिला प्रशासन गैस ऐजेसिया ने ओ.टी.पी. रा आधार माथे घर माथे सप्लाई बन्दोवस्त लागू करण रा निर्देश दिया है। वठे ई जालौर ज़िला मांय रसद महकमो सगळा उपभोक्तावां ऊँ पेट्रोल-डीजल बेवजह भेळो नी करण री अरज करी है।

000

मुख्यमंत्री भजन लाल शर्मा आज आर.ए.एस. परीक्षा-2023 मांय चुणी ज्या नुवा नियुक्त लोकसेवकां साथे बतळ करी। जयपुर रा बिरला सभागार मांय व्ह्या कार्यक्रम मांय मुख्य सचिव वी. श्रीनिवास, पुलिस महानिदेशक राजीव शर्मा अर न्यारा-न्यारा अहलकार मौजूद रिया। श्री शर्मा नुवानियुक्त अहलकारां ऊँ जन हित ने सर्वोपरि राखण री अरज करी।

इण ऊँ पैला मुख्यमंत्री जयपुर संत संसद कार्यक्रम मांय ई बोल्या। बणा कह्यो के संतां रो जीवन विश्व कल्याण सारू समर्पित होवे है। ई मौके गृह राज्यमंत्री जवाहर सिंह बेढ़म, विधायक बालमुकुन्दाचार्य समेत घणी तादाद मांय साधु-संत मौजूद रह्या।

000

प्रदेश रा आर्थिक अर सांख्यिकी निदेशालय कानी ऊँ तैयार करी ज्या फूड एण्ड न्यूट्रिशन सिक्योरिटी एनालिसिस डैशबोर्ड ने नामी स्कॉच गोल्ड अवार्ड 2025 ऊँ सनमानित करी ज्या है। ओ सनमान काले नुवी दिल्ली रा नेशनल हैबिटेट सेंटर मांय व्ह्या जळसा मांय दीरीज्यो। राज्य कानी ऊँ ओ इनाम निदेशालय रा सहायक निदेशक डॉ. प्रवीण कुमार हासिल कर्यो। ध्यानजोग है के ओ डैशबोर्ड राज्य मांय खाद्य अर पोषण हिफाजत रा हालात ने जिलावार आकलन प्रस्तुत करे है। विश्व थर माथ थापित मानकां रा आधार माथे तैयार ओ प्लेटफॉर्म नीति-निर्मातावां अर प्रशासनिक अहलकारां ने सटीक अर विगतवार विश्लेषण मुहैया करावे है, जिण ऊँ योजनावां ने असरदार लागू करण मांय मदद मिले है।

000

प्रदेश मांय आतूणी विक्षोभ रा असर ऊँ एक अप्रैल ताई आंधी, बारिश रो दौर चालण रो अंदेशो है। इण रा असर ऊँ उदयपुर, कोटा संभाग रा कुछ हलकां मांय तेज मेघगर्जन, ओला पडण अर कठेई-कठेई हळका ऊँ मझला दर्जा री बिरखा होवण री आस है। मौसम महकमो आज ई केई ठौड़ा आंधी चालण अर रूक-रूक ने बिरखा होवण सारू चेताया है। ई बीचे आज न्यारी-न्यारी ठौड़ां मौसम रो मिजाज बदल्यो निजर आयो। बाड़मेर मांय तेज आंधी चाली। पाली मांय बादल छायाी ज्या रिया। हनुमानगढ़ मांय केई ठौड़ां छांटा-छिड़को व्ह्यो।

000

पश्चिम मध्य रेलवे रा कोटा मण्डल रा थापना दिवस रे मौके एक अप्रैल ने रेल प्रदर्शनी लगायी जायेला। मेनाल ऑफिसर्स क्लब मांय लागण वाळी ई नुमाईश मांय इंजीनियरिंग, वाणिज्य, रेलवे सुरक्षा बल, सिग्नल अर दूरसंचार, विद्युत, यांत्रिक अर परिचालन समेत न्यारा-न्यारा महकमां री स्टॉल लगायी जायेला।

आ स्टॉल माथे कार्यशील मॉडल, डिजिटल स्क्रीन अर इंटरैक्टिव री मार्फत जाणकारी दी जायेला। वरिष्ठ मंडल वाणिज्य प्रबंधक सौरभ जैन बतायो के नुमाईश संवारा 11 बज्या ऊँ रात 10 बज्या ताई खुली रहवेला। प्रदर्शनी रा खास आकर्षणां मांय कवच 4.0 स्वचालित ट्रेन सुरक्षा प्रणाली, अमृत भारत स्टेशन योजना जस्सी पहल भेळी व्हेला।

000

भीलवाड़ा ज़िला रा जहाजपुर हलका रा नाथून गांव कने दो मोटरसाईकिलां री टक्कर मांय तीन लोगां री मौका माथे मौत व्हे गयी। हादसा मांय एक गहरा घायल रो ईलाज जहाजपुर रा अस्पताल मांय भर्ती करायी ज्यो है।

000

अजमेर रा हाथीखेडा हलका मांय बालिका सैनिक स्कूल री थापना री जावेला। आ स्कूल 30 एकड जमी मांय 20 करोड़ रिप्यां री लागत ऊँ बणाया जायेला। विधानसभा अध्यक्ष वासुदेव देवनानी काले अजमेर मांय शिक्षा विभाग रा अहलकारां री बैठक मांय सैनिक स्कूल री प्रगति री जाणकारी ली। वणा बतायो बेगा ई वर्कऑर्डर काड दिया जायेला।

0000

प्रदेश मांय नुवा रोकड बरस री सरूआत रे सागे ई 1 अप्रैल ऊँ स्कूलां अर आंगनबाडी केन्द्रा अस्पतालां रो बगत बदल जावेला। ओ बगत 30 सितम्बर ताई रहवेला। शिविरा पंचाग मुजब एक पारी मांय चालण वाळा स्कूल संवारा साढे सात बज्या ऊँ दोपहर एक बज्यां ताई अर दो पारी मांय चालण वाळा स्कूल रो बगत संवारा सात बज्यां ऊँ सिंज्या 6 बज्यां ताई रहवेला वठे ई आंगनबाडी केन्द्र संवारा 8 बज्यां ऊँ दोपहर 2 बज्यां ताई खुला रहवेला। सरकारी अस्पतालां मांय ओ.पी.डी. रो समय संवारे 8 बज्यां ऊँ 2 बज्यां ताई रहवेला। राजकीय अवकाश रा दिन ओपीडी संवारे 9 बज्यां ऊँ 11 बज्यां ताई रहवेला।

000